

Bangala - Abikisaki Buku na Nzambe - Deliverance Scriptures

Kotanga 10:35 Mbala nyoso sanduku ya kondimana ezalaki kokende, Moize azalaki koloba: "Nkolo, omimonisa! Banguna na yo bapanzana; mpe batu oyo bayinaka yo bakima yo!"

KozongelaMibeko 23:5(6) Kasi Nkolo Nzambe na bino aboyaki koyoka maloba ya Balama; mpo alingaka bino, akumisaki kotuka wana mapamboli.
(Nemaya 13:2)

Njembo 44:4(5) Yo, Nzambe, ozali Mokonzi na ngai; ezali yo nde ozali kolongisa Yakobo.

Isaya 61:1 Molimo ya Nkolo Nzambe azali likolo na ngai, mpamba te Nkolo asili kopakola ngai na mafuta mpo na komema nsango malamu mpo na batu ya mawa; ye asili kotinda ngai mpo na kobikisa batu oyo mitema na bango ebukani, mpo na kosakola bosomi mpo na baumbu mpe kobimisa batu oyo bazali na boloko; (Luka 4:18)

Matayo 6:13 Kamba biso kati na komekama te, kasi bikisa biso na maboko na motu mabe. Mpamba te bokonzi, nguya mpe nkembo ezali na yo mpo na seko. Amen.' (Luka 11:4)

Matayo 8:16 Ntango mpokwa ekumaki, bamemaki epai na Yesu batu mingi oyo bazalaki na milimo mabe. Yesu abenganaki milimo mabe yango na maloba na ye, mpe ye abikisaki lokola batu nyoso na malali.

Matayo 10:1,8 Yesu abengaki bayekoli zomi na mibale na ye, apesaki na bango nguya na kobengana milimo mabe mpe na kobikisa malali nyoso, mpe mpasi nyoso. (Mako 3:14,15) 8 Bobikisa batu na malali, bosekwisa bakufi, bobikisa batu na lepre, bobengana milimo mabe. Bino bosili kozwa mpamba, bopesa mpamba lokola.

Matayo 12:26-29 Soki Satana abengani Satana, ye azali kobundana na ye mpenza. Bongo bokonzi na ye ekotelema na ndenge nini? 27 Bozali kokanisa ete nazali kobengana milimo mabe mpo Balazebuba azali kopesa ngai nguya. Bongo nani apesaka nguya epai na batu elongo na bino? Batu elongo na bino mpenza bazali kosambisa bino! 28 Ya solo, mpo nazali kobengana milimo mabe na nguya na Molimo na Nzambe, oyo etalisi ete Bokonzi na Nzambe esili kokuma epai na bino. 29 "Motu moko te akoki kokota na ndako na motu makasi na kobotola misolo na ye, soki na liboso ye akangi motu makasi yango te. Soki ye asili kokanga motu makasi yango, ye akoki kobotola misolo nyoso na ndako na ye. (Mako 3:23-27)

Matayo 12:43-45 "Ntango molimo mabe asili kobima na motu, ye azali kokende mpe kozonga na bisika ekaoki koluka esika na kopema. Soki azwi yango te, 44 ye alobi, 'Nakozonga na ndako na esika nabimaki.' Ye azongi kuna mpe azwi ndako ezali mpamba, basili kokomba mpe basili kobongisa yango malamu nyoso. 45 Bongo ye akei kokamata milimo nsambo mosusu

koleka ye na mabe. Bazongi elongo mpe bafandi kuna. Ezali bobele boye ete nsuka na motu yango ekozala mabe koleka oyo na liboso. Likambo ekozala bobele boye mpo na batu mabe na lelo."

Matayo 15:22,26,28 Mwasi moko Mokanana, oyo azalaki na provese yango, akumaki epai na ye mpe angangaki: "Molakisi, Mwana ya Davidi, yokela ngai ngolu! Mwana mwasi na ngai azali na molimo mabe, mpe molimo yango azali kosala ye mabe!" 26 Yesu alobaki; "Ezali malamu te na kokamata bilei na bana mpe kobwaka yango epai na bambwa." 28 Bongo Yesu alobaki na ye; "O mwasi, kondima na yo ezali monene! Likambo ekosalema lokola yo ozali kolinga." Mpe mwana mwasi na ye abikaki na saa yango mpenza.

Matayo 16:19 Nakopesa na yo mafungola na Bokonzi ya lora: likambo okopekisa na mokili, ekopekisama na lora, likambo okolingisa na mokili, ekolingisama na lora." (Matayo 18:18)

Matayo 17:19-21 Bayekoli bakumaki epai na Yesu ntango batu mosusu bazalaki te, mpe batunaki ye: "Mpo na nini tokokaki te kobimisa molimo mabe yango?" 20 Yesu alobaki na bango: "Mpo bozali na kondima moke eleki. Nalobi na bino likambo ya solo: soki bozalaki na kondima ata moke lokola mbuma na mutadi, mbele bokoloba na ngomba oyo: 'Longwa awa mpe kende kuna,' mpe ngomba yango ekolongwa. Likambo moko te ekoleka bino. 21 Kasi ezali bobele na mabondeli mpe na koboya kolia bakoki kobimisa molimo ndenge oyo." ye

Mako 1:23-26 Bobele na ntango yango, motu oyo azalaki na molimo mabe amonanaki na ndako na losambo yango, mpe abandaki konganga: 24 "Yesu na Nazareta, likambo na biso na yo ezali nini? Osili kokuma awa mpo na koboma biso? Nayebi ozali Motu Petwa, Motu Nzambe atindaki." 25 Yesu alobaki maloba makasi epai na molimo mabe yango, apesaki ye motindo makasi koloba: "Kanga monoko na yo, mpe bima na motu oyo!" 26 Molimo mabe aningisaki motu yango makasi, angangaki, mpe abimaki na ye.

Mako 1:32-34 Na mpokwa, ntango moi esili kokufa, bamemaki batu na malali nyoso, mpe batu na milimo mabe epai na Yesu. 33 Batu nyoso na vile bayanganaki liboso na ekuke ya ndako. 34 Yesu abikisaki batu mingi oyo bazalaki koyoka mpasi na malali ndenge na ndenge, abenganaki milimo mabe mingi. Azalaki kopekisa milimo mabe na kosolola, mpo ete bayebaki ye malamu.

Mako 1:39 Bongo Yesu atambolaki kati na Galilaya mobimba, alakisaki kati na bandako na losambo nyoso na provese yango, mpe abenganaki milimo mabe.

Mako 5:8 (Ye alobaki boye mpo Yesu apesaki ye motindo boye: "Molimo mabe, bima na motu oyo!")

Mako 6:7,13 Ye abengaki bayekoli zomi na mibale na ye abandaki kotinda bango mibale mibale. Apesaki bango nguya na kobengana milimo mabe, 13

Bazalaki kobengana milimo mabe mingi, mpe bazalaki kobikisa batu mingi na mpasi, kopakola bango na mafuta.

Mako 9:23-25 Yesu alobaki na ye: "Ozali koloba, soki okoki! Kasi makambo nyoso ekokani na motu na kondima." 24 Nokinoki tata na mwana angangaki: "Nandimi! Sunga ngai mpo na kondima te na ngai!" 25 Yesu amonaki ebele ya batu kokima mbango epai na bango. Ye apesaki maloba makasi epai na molimo mabe yango, mpe alobaki na ye: "Molimo oyo akangisi monoko mpe matoi, napesi yo motindo: Bima na mwana oyo, mpe zonga lisusu epai na ye te!"

Mako 9:29 Yesu alobaki na bango: "Ezali bobele mpo na nguya na kobondela nde motu akoki kobimisa ndenge na molimo yango."

Mako 9:38,39 Yoane alobaki na Yesu: "Molakisi, tomonaki motu moko azalaki kobengana milimo mabe na nkombo na yo, mpe tolingaki kopekisa ye mpo ye azali elongo na biso te." 39 Kasi Yesu alobaki: "Bopekisa ye te, mpo motu moko te akoki kosala ekamwiseli na nkombo na ngai, mpe noki nsima na oyo ye abandi koloba mabe na ntina na ngai.

Mako 16:17 Mpe tala, batu na kondima ngai bakosala bikamwiseli oyo:
Bakobengana milimo mabe na nkombo na ngai. Bakosolola na lokota ya sika.

Luka 4:34-36 "Eh! Likambo na biso na yo ezali nini, Yesu na Nazareta? Osili kokuma mpo na koboma biso? Nayebi ozali nani: ozali Motu Mosantu Nzambe atindaki!" 35 Yesu alobaki maloba makasi epai na molimo mabe, apesaki ye motindo oyo: "Kanga monoko na yo, mpe bima na motu oyo!" Molimo mabe abwakaki motu yango na nse na miso na batu nyoso, mpe abimaki, kosala ye mabe moko te. 36 Batu nyoso bakamwaki mpe balobanaki katì na bango: "Maloba ndenge nini oyo? Na bokonzi mpe na nguya motu oyo azali kopesa motindo epai na milimo mabe, mpe bazali kobima."

Luka 4:41 Milimo mabe babimaki na batu mingi na malali, konganga na mongongo makasi: "Ozali Mwana ya Nzambe!" Kasi Yesu azalaki kopamela bango makasi mpe kopekisa bango na koloba monoko mpo bayebaki Yesu azalaki Masiya.

Luka 7:21 Na ntango yango mpenza Yesu abikisaki batu mingi na malali, na batu na nzoto molito mpe batu na milimo mabe, mpe afungolaki miso na batu mingi.

Luka 8:29 Alobaki boye mpo Yesu apesaki motindo na molimo mabe na kobima na motu yango. Molimo yango asili kokanga ye mbala mingi. Bongo batu bazalaki kokanga maboko mpe makolo na ye na minyololo, mpo na kokengela ye, kasi ye azalaki kobuka minyololo, mpe molimo mabe azalaki kotambolisa ye na zamba.

Luka 9:40 Nasengaki bayekoli na yo na kobengana molimo oyo, kasi bakokaki te."

Luka 10:17-20 Bayekoli ntuku nsambo na mibale bazongaki, kotonda na esengo, mpe balobaki: "Mokonzi, bobele milimo mabe bazali kotosa biso ntango tozali kopesa bango mitindo na nkombo na yo!" 18 Yesu alobaki na bango: "Namonaki Satana kokweya uta likolo lokola nkake. 19 Boyoka: nasili kopesa bino nguya na konyata nyoka mpe dapaya na makolo, mpe na koboma nguya nyoso na monguna. Eloko moko te ekoki kosala bino mabe. 20 Bosepela te mpo milimo mabe bazali kotosa bino, kasi bosepela mpo bakomaki nkombo na bino kuna na lora."

Luka 11:14 Yesu azalaki kobengana molimo mabe na motu oyo akumaki buba mpo na molimo yango. Ntango molimo mabe abimaki, buba abandaki kosolola, ebele ya batu bakawaki.

Luka 11:20-22 Solo nazali kobengana milimo mabe na nguya na Nzambe, oyo nde ezali kotalisa ete Bokonzi na Nzambe esili kokuma epai na bino. 21 "Soki motu makasi azali na bambeli ya etumba mpo na kokengela ndako na ye, mosolo na ye ekozala malamu. 22 Kasi soki motu makasi koleka ye akumi, alongi ye, abotoli bambeli na etumba na ye oyo azalaki kotia motema epai na yango, mpe motu makasi yango akokabola mosolo nyoso ye asili kobotola.

Luka 13:32 Yesu alobaki na bango: "Bokende koloba na nkoi yango: 'Ngai nazali kobengana milimo mabe, mpe nakokokisa mosala na kobikisa batu na malali lelo mpe lobi, mpe na mokolo na misato nakosilisa mosala na ngai.'

Yoane 14:12 Nayebisi bino solo: motu na kondima ngai akosala misala oyo nazali kosala lokola. Akosala bobele koleka mpo ete nazali kokende epai na Tata.

Yoane 17:15 Nasengi yo te na kolongola bango na mokili, kasi na kobatela bango mpo na motu mabe.

Misala Bantoma 10:38 Boyebi ndenge nini Nzambe asopaki nguya na Molimo Mosantu likolo na Yesu motu na vile na Nazareta. Yesu atambolaki kati na mokili kosala misala malamu mpe kobikisa batu nyoso oyo bazalaki nse na bokonzi na Jaboro, mpe Nzambe azalaki elongo na ye.

Misala Bantoma 16:17,18 Abandaki kolanda biso na Paulo, azalaki konganga: "Batu oyo bazali basali ya Nzambe na likolo nyoso! Bazali kosakola bino nzela na kobikisa!" 18 Mwasi asalaki oyo mpo na mikolo mingi. Nsimba na yango motema na Paulo efundaki, bongo abongwanaki alobaki na molimo yango: "Na nkombo na Yesu Kristo, nalobi na yo: 'Bima na ye!'" Mpe molimo abimaki na mwasi bobele na ntango yango.

Misala Bantoma 19:11,12 Nzambe azalaki kosala bikamwiseli mingi na maboko na Paulo. 12 Mpo na oyo bazalaki komema bilamba mpe litambala oyo ezalaki kobanda nzoto na Paulo mpo na kotia likolo na batu na malali. Bongo, bazalaki kobika na bamalali na bango, mpe milimo mabe bazalaki kobima na bango.

Misala Bantoma 26:15-18 Natunaki: 'Ozali nani, Mokonzi?' Mpe Mokonzi alobaki: 'Nazali Yesu, motu yo ozali konyokola ye. 16 Kasi longwa na likolo, telema na makolo na yo. Nabimaki epai na yo mpo na kotia yo mosali na ngai, mpo na kosolola likambo osili komona lelo na batu mosusu, ndenge nini nakotalisa yo nsima. 17 Nakobikisa yo na maboko na Bayuda mpe na maboko na batu mosusu oyo nakotinda yo epai na bango. 18 Natindi yo mpo na kofungola miso na bango, mpo na kolongola bango kati na molili, kokamba bango epai na mwinda, kolongola bango kati na bokonzi na Satana, kokamba bango epai na bokonzi na Nzambe. Mpo soki bandimi ngai, bakozwa kolimbisama na masumu na bango, bakozwa esika kati na batu na Nzambe.'

Baroma 16:20 Nzambe oyo apesaka kimia akobuka Satana nse na makolo na bino. Ngolu ya Mokonzi na biso Yesu Kristo ezala na bino!

2 Bakorinto 2:11 mpo na kotika Satana te koleka biso mpo toyebi malamu mingi mayele na ye.

Bagalatia 1:4 Kristo amipesaki ye mpenza mpo na kobikisa biso na masumu mpo na kofungola biso na boumbu na mokili mabe oyo, mpo na mokano na Nzambe Tata.

Baefeso 4:27 Bopesa Satana esika te.

Baefeso 6:11 Bolata biloko na etumba nyoso oyo Nzambe azali kopesa bino, boye bokoki kotelema malamu na kobunda na mobulu ya Satana.

2 Batesalonike 3:2,3 Bobondela lokola ete Nzambe abikisa biso na maboko na batu mabe mpe batomboki. Mpo ete batu nyoso te bazali kondima. 3 Kasi Mokonzi azali motu oyo akokisaka bilaka na ye. Ye akopesa bino bokasi mpe akokengela bino mpo na Motu mabe yango.

2 Timoteo 2:26 Bongo bakokanisa malamu lisusu, mpe bakolongwa na moteko na Satana oyo akangaki bango mpe atiaki bango na kotosa mokano na ye.

2 Timoteo 4:18 Mokonzi akobikisa ngai na mabe nyoso mpe akokotisa ngai malamu kati na Bokonzi na ye na lora. Nkembo ezala na ye lobiko na lobiko! Amen.

1 Petero 5:8 Bolala mpongi te, bokeba! Mpamba te monguna na bino Jaboro azali konguruma lokola ntambo oyo azali kolela, na koluka nini ye akolia.

1 Yoane 4:4 Kasi bino bana na ngai, bozali batu na Nzambe mpe bosili kolonga banebi ya lokuta, mpo Molimo oyo azali kati na motema na bino azali na nguya mingi koleka molimo oyo azali kati na batu na mokili.